

**BOSNA I HERCEGOVINA
FEDERACIJA BOSNE I HERCEGOVINE
AGENCIJA ZA REVIZIJU PRIVATIZACIJE U FEDERACIJI BOSNE I
HERCEGOVINE**

IZVJEŠTAJ

**O RADU AGENCIJE ZA REVIZIJU PRIVATIZACIJE
U FEDERACIJI BOSNE I HERCEGOVINE
ZA PERIOD 01.07. – 31.12.2015. GODINE**

Sarajevo, mart/ožujak 2016. godine

SADRŽAJ

1. UVOD	3
2. NADLEŽNOST AGENCIJE	4
3. RUKOVOĐENJE I ORGANIZACIJA AGENCIJE	5
4. STRATEŠKI CILJEVI	7
5. SMJEŠTAJ AGENCIJE	8
6. SREDSTVA ZA RAD AGENCIJE	8
7. REALIZACIJA PLANSKIH AKTIVNOSTI AGENCIJE ZA 2015. GODINU	8
10. FINANSIJE	12
11. RAD NA REVIZIJI	17
Faze i planirani tok revizije	17
Rezultati i izvještavanje	18
12. ZAKLJUČAK	21

Na osnovu člana 6. tačka d.) Uredbe o osnovama organizacije i načinu poslovanja Agencije za reviziju privatizacije u Federaciji Bosne i Hercegovine („Službene novine Federacije BiH“, br. 16/14; 58/14; 75/14 i 20/15), direktor Agencije za reviziju privatizacije Vladi Federacije Bosne i Hercegovine podnosi,

IZVJEŠTAJ O RADU

1. UVOD

Agencija za reviziju privatizacije u Federaciji Bosne i Hercegovine (u daljem tekstu: Agencija) djeluje kao samostalna institucija u Federaciji Bosne i Hercegovine, čija je djelatnost propisana odredbama člana 7. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) u daljem tekstu (Zakon).

Na osnovu Zakona, Agencija je dužna najmanje jedanput godišnje Vladi Federacije Bosne i Hercegovine podnijeti izvještaj o vršenju povjerenih javnih ovlaštenja i svakih šest mjeseci putem Vlade Federacije Bosne i Hercegovine informirati Parlamentarno povjerenstvo FBiH, Parlament FBiH o izvršenim revizijama privatizacije državnog kapitala privrednih društava i banaka u FBiH.

Na osnovu Uredbe o osnovama organizacije i načinu poslovanja Agencije direktor ima dužnost Vladi Federacije Bosne i Hercegovine podnositi izvještaj o radu Agencije najmanje svakih šest mjeseci.

Na osnovu Zakona, Agencija će provoditi reviziju u skladu sa odredbama ovog zakona i Zakona o reviziji institucija u Federaciji Bosne i Hercegovine („Službene novine Federacije BiH“, br.22/06).

Agencija ima svojstvo pravnog lica.

Sjedište Agencije je u Sarajevu, Ulica Ustanička 11.

Organizacija, upravljanje i rukovođenje Agencijom uređuje se Uredbom i drugim općim aktima Agencije, u skladu sa Zakonom.

U okviru svoje nadležnosti Agencija ima javna ovlaštenja za donošenje pojedinačnih upravnih akata u skladu sa Zakonom o upravnom postupku. Osnove organizacije i način poslovanja Agencije uređuje Vlada Federacije Bosne i Hercegovine podzakonskim aktima.

Na osnovu naprijed navedenog, Vlada Federacije Bosne i Hercegovine je na 42. hitnoj sjednici, održanoj 13.02.2014. godine, na osnovu člana 19. stav 1. Zakona o Vladi Federacije Bosne i Hercegovine („Službene novine FBiH“, br.: 1/94, 8/95, 58/02, 19/03, 2/06 i 8/06) i člana 10. Zakona, donijela Uredbu o osnovama organizacije i načinu poslovanja Agencije.

Na osnovu Uredbe, direktor, zaposlenici i zastupnici Agencije ne smiju primati nikakve novčane ili druge darove, ako bi to moglo uticati na njihovu objektivnost u obavljanju poslova za Agenciju.

Zakon o državnoj službi u Federaciji BiH ne odnosi se na zaposlene u Agenciji.

Ako prava i obaveze zaposlenih iz radnih odnosa nisu regulisani Zakonom i Uredbom, primjenjuje se Zakon o radu Federacije BiH.

Misija Agencije je osigurati da se na profesionalan i učinkovit način te u skladu sa međunarodno priznatim standardima revizije i najboljim praksama u EU provede revizija privatizacije kako bi se utvrdio naknadni proces ispitivanja i ocjene ispravnosti procesa privatizacije privrednih društava i banaka u Federaciji BiH.

Cilj Agencije je osigurati da se na učinkovit način ispita i ocijeni da li je proces privatizacije izvršen na odgovarajući način i u skladu sa zakonskim procedurama te da li je nakon izvršene privatizacije u privrednim društvima i bankama došlo do povrede ugovorenih prava i obaveza.

Uloga Agencije je omogućiti javnosti da na transparentan način prezentira cjelokupan presjek izvršene privatizacije u cjelokupnom obimu te da da doprinos razvoju BiH društva kroz uspostavu provjere procesa privatizacije i utvrdi nepravilnosti prilikom istih, a isto tako prezentira i one privatizacije koje su uspješno provedene.

Svjesni svih izazova koji stoje pred Agencijom, a koji se kreću od nedovoljnih kapaciteta do obaveza, možemo konstatovati da je s obzirom na broj uposlenog kadra u Agenciji, ostvaren napredak u ispunjavanju većine obaveza koje stoje pred Agencijom.

2. NADLEŽNOST AGENCIJE

Prema Zakonu o reviziji privatizacije u Federaciji Bosne i Hercegovine (u daljem tekstu: Zakon), koji je donesen u aprilu 2012. godine, a stupio na snagu u junu 2012. godine, Agencija je dužna obaviti reviziju u svim privrednim društvima i bankama u razdoblju od pet godina od dana usvajanja Zakona.

Revizija privatizacije državnog kapitala u privrednim društvima i bankama provodi se sa ciljem zaštite prava građana utvrđenih Ustavom Federacije BiH državne svojine u procesu privatizacije u FBiH i javnog interesa.

Revizija privatizacije tretirat će i stvari i prava sa pripadajućim kapitalom privrednih društava (privatiziranih i ne privatiziranih) koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze prema

pravnim licima iz država nastalih raspadom bivše Socijalističke Federativne Republike Jugoslavije.

Revizija privatizacije državnog kapitala u privrednim društvima i bankama uključivat će i raspolaganje novčanim sredstvima ostvarenim prodajom privrednih društava i banaka.

Revizija privatizacije, prema Zakonu, provodi se u privrednim društvima i bankama čiji je državni kapital privatiziran ili se privatizuje u skladu sa odredbama Okvirnog Zakona o privatizaciji preduzeća i banaka u BiH („Službeni glasnik BiH“, br. 14/98, 12/99, 14/00, 16/02 i 88/05), Zakonu o privatizaciji preduzeća („Službene novine Federacije BiH“, BR. 27/97, 8/99, 32/00, 45/00, 54/00, 27/01, 61/01, 27/02, 33/02, 28/04, 44/04, 42/06 i 4/09), Zakona o privatizaciji banaka („Službene novine Federacije BiH“, br. 12/98, 29/00, 37/01 i 33/02), Zakona o početnom bilansu stanja preduzeća i banaka („Službene novine Federacije BiH“, br. 12/98, 40/99, 47/06, 38/08 i 65/09) i Zakona o vlasničko – pravnim odnosima („Službene novine Federacije BiH“, br. 6/98 i 29/03).

Revizija pretvorbe vlasništva provodit će se i u privrednim društvima gdje je pretvorba izvršena prije donošenja Zakona o privatizaciji preduzeća.

Postupci revizije privatizacije određeni su INTOSAI – revizijskim standardima te Kodeksom profesionalne etike revizora i drugim propisima koji uređuju pravila i metodologiju rada Agencije.

3. RUKOVOĐENJE I ORGANIZACIJA AGENCIJE

Organizacija, upravljanje i rukovođenje Agencijom uređuje se Uredbom Vlade Federacije Bosne i Hercegovine, Statutom i drugim općim aktima u skladu sa Zakonom.

Ovlasti direktora, poslovi stručnih službi i ostala pitanja vezana uz organizaciju, upravljanje i rukovođenje radom Agencije, detaljno su razrađeni pravilnicima i drugim aktima kao što je unutrašnja organizacija i sistematizacija radnih mjesta i druga pitanja koja se odnose na radne odnose i funkcionisanje Agencijom.

Svi akti predviđeni Uredbom donijeti su u 2014. godini, a nakon dobijene saglasnosti Vlade Federacije Bosne i Hercegovine, dok su podzakonski akti (koji su potrebni da se donesu prema smjernicama Federalnog ministarstva finansija) također doneseni dijelom u 2014., a dijelom u 2015. godini.

Rukovođenje

Direktor Agencije za reviziju privatizacije predstavlja i zastupa Agenciju, rukovodi radom Agencije i odgovoran je za njen rad. Direktora na mandatni period od 5 (pet) godina imenuje Vlada Federacije Bosne i Hercegovine.

Nadzor nad povjerenim javnim ovlaštenjima iz člana 8. Zakona vrši Vlada Federacije Bosne i Hercegovine.

Organizacija

Za obavljanje poslova i zadataka iz nadležnosti Agencije, obrazovane su osnovne organizacione jedinice:

- Kabinet direktora.
- Sektor za reviziju privrednih društava.
- Sektor za reviziju banaka.
- Sektor za pravne i opšte poslove, finansijsko – računovodstvene poslove i ljudske resurse.

Kabinet direktora

U Kabinetu direktora vrše se stručni savjetodavni poslovi iz nadležnosti revizije privatizacije, poslovi sigurnosti poslovnih procesa u Agenciji, stručno – operativni poslovi iz nadležnosti ove organizacione jedinice, protokolarni i operativni poslovi tehničkog sekretara značajni za rad direktora Agencije.

Sektor za reviziju privrednih društava

U Sektoru za reviziju privrednih društava obavljaju se poslovi naknadnog procesa ispitivanja i ocjena ispravnosti procesa privatizacije privrednih društava koji obuhvata: postupke i pismena Vlade Federacije Bosne i Hercegovine, Agencije za privatizaciju, Federalnog ministarstva finansija, Komisije za vrijednosne papire i Registra vrijednosnih papira, kao i odluke i postupke drugih organa Federacije Bosne i Hercegovine i kantona; procedure u pripremi i provedbi privatizacije privrednih društava, dokumente (poslovne i knjigovodstvene isprave), poslovne knjige i računovodstvene finansijske izvještaje; zaključene ugovore o privatizaciji i vjerodostojnu dokumentaciju o izvršavanju ugovorenih obaveza, promjenu obavljanja djelatnosti privrednih društava suprotno uvjetima iz ugovora o prodaji; promjenu imena ili prestanak rada privrednog društva suprotno ugovoru o privatizaciji.

Sektor za reviziju banaka

U Sektoru za reviziju banaka obavljaju se poslovi naknadnog procesa ispitivanja i ocjena ispravnosti procesa privatizacije banaka koji obuhvata: postupke i pismena Vlade Federacije Bosne i Hercegovine, Agencije za privatizaciju, Agencije za bankarstvo, Federalnog ministarstva finansija, Jedinice za privatizaciju banaka, Komisije za vrijednosne papire i Registra vrijednosnih papira, kao i odluke i postupke drugih organa Federacije Bosne i Hercegovine i kantona, procedure u pripremi i provedbi privatizacije banaka, finansijske i računovodstvene transakcije koje se odnose na privatizaciju banaka, zaključene ugovore o privatizaciji i vjerodostojnu

dokumentaciju o izvršavanju ugovorenih obaveza, promjenu obavljanja djelatnosti banaka suprotno uvjetima iz ugovora o prodaji, promjenu imena ili prestanak rada banke suprotno ugovoru o privatizaciji.

Sektor za pravne i opšte poslove, finansijsko – računovodstvene poslove i ljudske resurse

Djelokrug Sektora obuhvata praćenje primjene zakona, podzakonskih akata i drugih propisa i općih akata koji se odnose na finansijsko, računovodstveno, kancelarijsko i arhivsko poslovanje Agencije. Vođenje finansijsko – računovodstvenih poslova i u tom pogledu: izrada finansijskih planova i izvještaja, prikupljanje, sastavljanje, obrada evidencija i kontrola knjigovodstvenih isprava, vođenje poslovnih knjiga, popis imovine i obaveza, poslovi planiranja i izvještavanja kroz pripremu periodičnih i godišnjeg obračuna, obračun plaća i drugih naknada zaposlenika, usklađivanje normativnih i drugih pravnih i administrativnih akata Agencije sa zakonskim propisima, učešća u pripremi općih i pojedinačnih akata vezanih za unutrašnju organizaciju i sistematizaciju poslova i radnih zadataka. Usklađivanje unutrašnje organizacije Agencije sa zakonskim propisima i Odlukama i zaključcima Vlade Federacije Bosne i Hercegovine, preraspodjelu poslova i radnih zadataka, kadrovsko osposobljavanje.

4. STRATEŠKI CILJEVI

Agencija je u okviru svojih zakonskih ovlasti i obaveza djelotvornog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

Strateški ciljevi		
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu Federacije Bosne i Hercegovine, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

5. SMJEŠTAJ AGENCIJE

Sjedište Agencije je u ulici Ustanička, br.11, Ilidža, u zgradi Federalnog zavoda za geologiju na IV spratu. Navedeni prostor je u vlasništvu Vlade Federacije Bosne i Hercegovine, a za korištenje je Vlada Federacije Bosne i Hercegovine dala saglasnost. Osigurani su i svi neophodni materijalno – tehnički preduslovi za efikasan rad uposlenih u Agenciji.

Također, osiguran je i kancelarijski namještaj za potpunost i rad Agencije u skladu sa Pravilnikom o unutrašnjoj organizaciji.

6. SREDSTVA ZA RAD AGENCIJE

Sredstva potrebna za rad Agencije za reviziju privatizacije u FBiH, osiguravaju se iz Budžeta Federacije BiH na osnovu finansijskog plana u skladu sa odredbama člana 11. Zakona. Za svaku godinu ona se planiraju u finansijskom planu i dostavljaju Federalnom ministarstvu finansija na usvajanje, od čega se cijeli iznos osigurava iz Budžeta FBiH jer je Agencija prema Uredbi Vlade Federacije Bosne i Hercegovine („Službene novine Federacije BiH“ broj 58/14) postala i formalno budžetski korisnik te nema mogućnost priliva sredstava iz drugih izvora.

7. REALIZACIJA PLANSKIH AKTIVNOSTI AGENCIJE ZA 2015. GODINU

Program rada Agencije za reviziju privatizacije za 2015. godinu, temeljio se na osnovu člana 14. stav 1. Zakona kao i na osnovu Uredbe Vlade Federacije Bosne i Hercegovine člana 6. stav 3. tačka c. od 13. februara 2014. V.broj 274/2014. Prema Planu rada procjene Agencije su da je za jedan revizorski izvještaj sa svim kompletnim zakonskim procedurama potrebno u prosjeku od dva i pol do tri mjeseca da se izvrši revizija u privrednom društvu ili banci. Važno je za naglasiti da dinamika i tempo revizije privrednih društava i banaka najviše zavise od prijema zaposlenika i planiranih finansijskih sredstava iz budžeta za svaku godinu. Agencija posebno akcentira da početak realizacije Plana za 2015. godinu otpočinje sa minimalnim brojem zaposlenika (od planiranih sistematizacijom).

U skladu sa odobrenim brojem zaposlenika od strane Vlade Federacije Bosne i Hercegovine, kao i u skladu sa odobrenim budžetskim finansijskim sredstvima, Agencija je planirala da u 2015. godini izvrši 20 revizija privatizacije u privrednim subjektima i bankama (sa ukupno 8 revizora). Lista izbora subjekata revidiranja se najvećim dijelom bazirala na osnovu Zaključka Vlade Federacije Bosne i Hercegovine, a sa utvrđene liste privrednih subjekata koju je Vlada Federacije Bosne i Hercegovine donijela na 110. sjednici, zatim zahtjevima općinskih vijeća i načelnika na teritoriji Federacije Bosne i Hercegovine kao i zahtjevima radnika. Plan

zapošljavanja nedostajućih revizora nije se ispunio (8 revizora u januaru 2015. godine), a s obzirom da u Agenciji rade samo dva revizora, nije bilo moguće Plan rada ispuniti kako je planirano.

Agencija je dana 20.11.2015. godine, dostavila Vladi Federacije Bosne i Hercegovine, Informaciju o izvršenim revizijama privrednih društava i banaka u Federaciji Bosne i Hercegovine za period mart oktobar 2015. godine. Ova obaveza je definirana članom 13. Zakona o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12), na osnovu kojeg Agencija svakih šest mjeseci putem Vlade Federacije Bosne i Hercegovine informira Parlamentarnu komisiju i Parlament Federacije Bosne i Hercegovine o izvršenim revizijama privatizacije državnog kapitala u privrednim društvima i bankama.

Vlada Federacije Bosne i Hercegovine, Zaključkom V.broj: 1591/2015 od 26.11.2015. godine, obavijestila Agenciju za reviziju privatizacije u FBiH da je Informaciju o izvršenim revizijama privatizacije primila na znanje i uputila Parlamentu Federacije Bosne i Hercegovine i Parlamentarnoj komisiji Federacije Bosne i Hercegovine na daljnje postupanje.

Predstavnički dom Parlamenta Federacije Bosne i Hercegovine je na svojoj 7. redovnoj sjednici održanoj 03.02.2016. godine prihvatio Informaciju o izvršenim revizijama privatizacije državnog kapitala privrednih društava i banaka u FBiH i usvojio Zaključak kojim nalaže Vladi Federacije Bosne i Hercegovine da pristupi izmjenama i dopunama Zakona o reviziji privatizacije državnog kapitala u privrednim društvima i bankama i da iz moratorija na zapošljavanje izuzme Agenciju za reviziju privatizacije u FBiH sa dopuštenjem da uposli šest revizora.

8. KADROVSKO POPUNJAVANJE

Prema planu i operativnim sredstvima za početak rada Agencije, uz saglasnost Vlade Federacije Bosne i Hercegovine, planirano je da se u Agenciji zaposli 10 zaposlenika, osam na poslovima revizije i dva u administraciji, i direktor sa svojim ovlastima. Međutim, u Agenciji od dana osnivanja pa sve do danas, još uvijek nema odobreni broj zaposlenih.

Agencija je osnovana 2014. godine, od tada po do danas u Agenciji radi jedan tim revizora, odnosno dva revizora, na predmetima revizije. Nakon prvog konkursa, koji je završen krajem januara 2015. godine, sa radom u Agenciji počela su dva stručna saradnika, jedan za finansijsko računovodstvene poslove i jedan za opšte i pravne poslove, i dva revizora za reviziju privrednih društava. Nakon toga, početkom marta raspisan je drugi konkurs, za popunu neupražnjenih revizorskih radnih mjesta. Konkursna procedura se odvijala planiranim tokom, nakon zaprimljenih i pregledanih prijava svih kandidata koji su aplicirali, napravljena je lista svih kandidata koji ispunjavaju uslove. Planiran je bio termin zakazivanja stručnog ispita sa kandidatima

sa liste, ali u međuvremenu je stigao Zaključak Vlade Federacije Bosne i Hercegovine V. broj: 424/2015 od 02.04.2015. godine, o obustavi svih konkursnih procedura u federalnim institucijama. Pridržavajući se donesenog Zaključka, obavijestili smo kandidate o obustavi konkursa.

U drugom donešenom Zaključku V. broj: 624/2015, navedeno je da budžetskim korisnicima koji imaju potrebu za prijem službenika, Vlada Federacije Bosne i Hercegovine daje saglasnost uz prethodno pribavljeno mišljenje Federalnog ministarstva finansija.

Poslije drugog Zaključka Vlade Federacije Bosne i Hercegovine, dana 28.05.2015. godine zatražili smo mišljenje od Federalnog ministarstva finansija o započetoj konkursnoj proceduri, kako je navedeno u Zaključku. Odgovor, tj. pozitivno mišljenje, od Federalnog ministarstva finansija smo zaprimili 10.07.2015. godine., koje smo predali Vladi Federacije Bosne i Hercegovine na uvrštavanje na prvi dnevni red naredne sjednice, kako bi dobili saglasnost za prijem zaposlenika. Vlada Federacije Bosne i Hercegovine nije dala saglasnost za prijem 5 (pet) zaposlenika revizorskog osoblja, iako je Ukazom o proglašenju Budžeta Federacije Bosne i Hercegovine za 2015. godinu br. 01-02-307-02/15 od 31.03.2015. godine usvojen i Budžet Agencije za 2015. godinu kojim su planirana sredstva za 10 (deset) zaposlenika za koliko je Odlukom Vlade Federacije Bosne i Hercegovine i dobivena saglasnost. Moramo naglasiti da Agencija nema uposlene revizore za banke, a po Zakonu o reviziji privatizacije državnog kapitala privrednih društava i banaka ("Službene novine Federacije BiH", broj 55/12) (u daljem tekstu: Zakon), nadležna je da vrši i reviziju banaka. Agencija je dužna provesti postupak revizije u svim privrednim društvima i bankama, najkasnije u roku od 5 (pet) godina od dana stupanja na snagu Zakona. Imajući u vidu da je Agencija počela sa radom u junu 2014. godine, tj. 2 (dvije) godine nakon stupanja Zakona na snagu, a postupak revizije započeo u martu 2015. godine, samim tim rok za završetak svih revizija zapravo je 3 (tri), a ne 5 (pet) godina. S obzirom da je broj privrednih društava i banaka koje Agencija treba da revidira znatno veliki taj rok je veoma kratak za uspješno obavljanje svih revizija, a posebno otežavajuću okolnost predstavlja nedostatak revizorskog osoblja kao i ostalog stručnog osoblja predviđenog Pravilnikom o unutrašnjoj organizaciji i sistematizaciji radnih mjesta Agencije.

Takođe, svakodnevno zaprimamo zahtjeve za reviziju privrednih društava, od strane fizičkih lica, advokata koji zastupaju određene predmete, predstavnika sindikata, koji zahtijevaju da Agencija započne reviziju privatizovanih preduzeća. Primamo i telefonske pozive novinara raznih medijskih kuća, koji pokazuju interesovanje za posao koji obavljamo, insistiraju na pitanjima, tipa, koje su revizije započete, dokle se stiglo po pitanju nekih određenih preduzeća čije su privatizacije javnosti aktuelne. Sve navedeno predstavlja Agenciji veliki problem, na sve zahtjeve treba da odgovorimo i objasnimo zbog čega nismo u mogućnosti otvoriti neku reviziju i zašto nismo uspjeli završiti veći broj revizija. Direktor Agencije, nema savjetnike ni pomoćnike, što takođe predstavlja jednu od otežavajućih okolnosti. Samim Zakonom i Uredbom o osnovama organizacije i načinu poslovanja Agencije („Službene novine

Federacije BiH“ br. 16/14; 58/14; 75/14 i 20/15) data je obaveza izvještavanja Vlade Federacije Bosne i Hercegovine o radu Agencije najmanje svakih šest mjeseci i Parlamenta Federacije Bosne i Hercegovine o izvršenim revizijama. Sve navedeno je teško ispoštovati, iz razloga što Agencija ne stiže da obavlja poslove za koje je nadležna u jačem intenzitetu kao što bi trebala, jer nedostatak uposlenog osoblja se odražava na sam rad Agencije. Važno je istaći, da je započeta konkursna procedura početkom marta obustavljena u samoj fazi završetka. Dobivanjem saglasnosti Vlade Federacije Bosne i Hercegovine za prijem neophodnog revizorskog osoblja, kandidati koji su aplicirali bili bi pozvani na stručni intervju, i u vrlo kratkom roku bi se izvršio prijem. Moramo naglasiti da je na dva raspisana konkursa bio veoma mali broj aplikanata za pozicije revizora i pomoćnika revizora, što takođe predstavlja veliki problem.

9. PLAN RADA ZA 2016. GODINU

Agencija je Planom rada za 2016. godinu, planirala 5 privrednih društava za revidiranje, u skladu sa trenutno zaposlenim revizorskim osobljem. Vlada Federacije Bosne i Hercegovine je na svojoj 39. sjednici održanoj 02.02.2016. godine, donijela Odluku V.broj: 229/2016 od 02.02.2016. godine o usvajanju Plana rada Agencije za reviziju privatizacije u FBiH.

Planirano je da se izvrši revizija sljedećih privrednih subjekata na području Federacije BiH:

Redni broj	Subjekti revizije privatizacije	Početak revizije	Završetak revizije	Opis
1	„Vranica“ d.d. Sarajevo	01.01.2016.	30.03.2016.	Izvršiti reviziju privatizacije za navedeni privredni subjekat po Zaključku Vlade FBiH
2	Centrotrans-DC doo Sarajevo	15.03.2016.	15.06.2016.	Izvršiti reviziju privatizacije za navedeni privredni subjekat po Zahtjevu Direktora društva i sindikata
3	Rudnik mangana d.d. Bužim	01.06.2016.	15.08.2016.	Izvršiti reviziju privatizacije za navedeni privredni

				subjekat po Zaključku Vlade FBiH
4	Hotel „Dalmacija“ doo Kiseljak	01.08.2016.	15.10.2016.	Izvršiti reviziju privatizacije za navedeni privredni subjekat po Zahtjevu Općinskog načelnika Kiseljak
5	BNT „Kovačnica“ Novi Travnik	01.10.2016.	31.12.2016.	Izvršiti reviziju privatizacije za navedeni privredni subjekat po Zahtjevu Općinskog načelnika Novi Travnik
Ukupno	2016. godina			5 (pet) privrednih subjekata

S obzirom da je moratorij na zapošljavanje u entitetskim institucijama na snazi do 30. juna 2016. godine, i da je usvojenim budžetom Agencije za 2016. godinu, planirano 10 (deset) uposlenih, očekujemo da će Vlada Federacije Bosne i Hercegovine dati saglasnost za prijem ostalog revizorskog osoblja. Tako bi Plan rada za 2016. godinu, bio planiran sa 8 revizora, odnosno 4 tima i samim tim uradila bi se dopuna Plana rada zbog povećanja broja revizija privrednih društava i banaka koje treba revidirati. Sa trenutnim zaposlenim revizorskim osobljem, nije moguće planirati veći broj privrednih društava, jer iz dosadašnjeg iskustva, pouzdano se može reći da je za reviziju jednog privrednog društva potrebno od dva do tri mjeseca aktivnog rada. Planom rada za 2016. godinu, nije planirana privatizacije banaka u Federaciji Bosne i Hercegovine, iz razloga, što nemamo zaposlenih revizora za banke.

10. FINANSIJE

Sredstva za rad Agencije za reviziju privatizacije u Federaciji Bosne i Hercegovine u 2015.godini osigurana su u budžetu Federacije Bosne i Hercegovine, a u skladu sa članom 11. Zakona o budžetu FBiH. Usvajanjem budžeta za 2015.godinu –Ukazom o proglašenju budžeta za 2015.godinu („Sl.novine Federacije BiH“, br.25/15) od 31.03.2015.godine. Agenciji su obezbjeđena sredstva i stvoreni uslovi za pravilno i

zakonito vođenje materijalnog i finansijskog poslovanja u skladu sa zakonskom regulativom za budžetske korisnike.

Planirani prihod Agencije za 2015.godinu je ostvaren 100%.

U 2015.godini Agenciji su za potrebe realizacije planiranih poslova i zadataka odobrena sredstva u budžetu u iznosu od KM 399.100,00 . Odobrena novčana sredstva su se u drugom polugodištu 2015.godine koristila racionalno u skladu sa operativnim planovima po mjesecima, zavisno od planiranih mjesečnih troškova.Svi finansijski izvještaji za period juli-decembar 2015.godine sastavljeni su u skladu sa odredbama Zakona o budžetima Federacije BiH („Sl.novine Federacije BiH br.19/06, 76/08, 5/09, 32/09, 51/09, 9/10, 36/10, 45/10, 25/12,103/13, 9/14, ispravka 13/14), Uredbom o računovodstvu budžeta u FBiH,(„Sl.novine Federacije BiH“,br.1/11). Planovi su sačinjeni na osnovu planiranog obima i dinamike rada Agencije u procesu revizije privatizacije u FBiH, pri čemu smo bili krajnje fiskalno odgovorni u dijelu realnog i svrsishodnog planiranja budžetskih sredstava, kako bismo dali svoj doprinos u realizaciji uravnoteženja budžeta u uslovima oporavka domaće privrede.

U periodu od 01.07 do 31.12.2015.godine, Agencija se u okviru svog računovodstva i finansija u cijelosti pridržavala svojih obaveza i rokova prilikom sačinjavanja dokumenata koji se dostavljaju u određene sektore u Federalno ministarstvo finansija, poštujući zakonsku regulativu kojom je regulisano trezorsko poslovanje.

U Agenciji su uredno, ažurno i tačno vođene sve pomoćne knjige kao analitičke knjigovodstvene evidencije i to :

- Pomoćne knjige za unos podataka u informacioni sistem Trezora,
- Pomoćne knjige propisane Pravilnikom o knjigovodstvu budžeta u FBiH.

Evidentiranje transakcija po osnovu promjena stalnih sredstava, zaliha,obaveza i blagajničkog poslovanja vršeno je na način da su se u Federalni trezor slali podaci vrijedonosno, a u Agenciji su te promjene evidentirane u skladu sa propisima o knjigovodstvu. Propisani obrasci za knjiženje u Glavnoj knjizi trezora su dostavljani na vrijeme, tj.sve transakcije (poslovne promjene) su evidentirane u pomoćnim knjigama Agencije odmah po nastanku i proslijeđene u Trezor radi knjiženja. Pri tome je najmanje jednom mjesečno uvidom u analitičke kartice vršena kontrola provedenih knjiženja.

S obzirom na centralizovan obračun plaća, finansijsko-računovodstveni sektor je u periodu od jula do decembra Službi zajedničkih poslova FBiH uredno i u predviđenim rokovima dostavljao sve neophodne podatke za obračun plaće, a u pomoćnoj knjizi za obračun plaća su osigurani podaci o prisutnosti zaposlenih na radu, podaci o ostalim naknadama i administrativnim zabranama. Poreznoj upravi i Zavodu za statistiku u zakonskom roku su dostavljani neophodni obrasci vezani za plaću.

Sve knjigovodstvene isprave u Agenciji za ovaj period izvještavanja su pregledane od strane stručnog saradnika za računovodstveno-finansijske poslove, te je utvrđeno

da su iste vjerodostojne, tj. da odražavaju nastali poslovni događaj. Posebno je obraćena pažnja na ažurnost, tj. da se ove isprave u što kraćem roku dostave u Federalno ministarstvo finansija na knjiženje, jer Agencija nema direktan pristup informacionom sistemu i svoje podatke i zahtjeve za unos podataka dostavlja na propisanim obrascima potpisanim od ovlaštene osobe, sa priloženim fotokopijama originalnih dokumenata. U toku polugodišta smo sedmično i mjesečno od Federalnog ministarstva finansija tražili i dobijali određene vrste izvještaja radi kontrole pojedinačnih knjiženja, konta i uvida u izmirenje svih stvorenih obaveza za ovaj period. Krajem decembra smo takođe izvršili kontrolu tačnosti i pravilnosti unosa podataka, a sve u cilju usklađivanja analitičke knjigovodstvene evidencije u pomoćnim knjigama sa odgovarajućim sintetičkim kontima glavne knjige prema odredbama Zakona o računovodstvu i reviziji u FBiH („Službene novine Federacije BiH“, broj: 83/09) i pripreme godišnjeg obračuna za 2015. godinu.

Pošto smo kao budžetski korisnik obavezni sačiniti popis imovine, potraživanja i obaveza na kraju svake budžetske godine, tj. sa stanjem na dan 31.12.2015.godine, direktor Agencije je na osnovu prethodno donesenih internih akata svojom odlukom imenovao komisiju za popis imovine, potraživanja i obaveza, te ih upoznao sa svrhom i sadržinom njihovog rada i njihovom odgovornošću. Popis je obavljen u periodu od 25.12.2015. godine do 30.12.2015. godine. Po završenom popisu komisija je izvršila usklađivanje i sravnjenje stanja utvrđenog popisom sa knjigovodstvenim stanjem i sastavila izvještaje o izvršenom popisu. Izvještaji komisije su dostavljeni direktoru na usvajanje. U finansijsko-računovodstvenom sektoru je izvršen konačan obračun amortizacije stalnih sredstava za 2015. godinu po linearnoj metodi otpisa uz primjenu godišnjih stopa shodno odredbama Pravilnika o knjigovodstvu Budžeta u FBiH.

Posebno smo obratili pažnju na blagajničko poslovanje, tj izvršili smo kontrolu evidentiranja i izvršavanja transakcija u blagajni, a sve u skladu sa Uredbom o uslovima i načinu plaćanja gotovim novcem („Službene novine Federacije BiH“, broj 72/15), Uputstvom o blagajničkom poslovanju („Službene novine Federacije BiH“, broj 94/07) i Računovodstvenim politikama za federalne budžetske korisnike i Trezor.

Dana 20.12.2015. godine smo Federalnom ministarstvu finansija dostavili Odluku o visini blagajničkog maksimuma za 2016. godinu, u svrhu realizacije čekova u 2016. godini.

Federalnom ministarstvu finansija su dostavljeni mjesečni operativni planovi za period juli-decembar, te tromjesečni planovi za juli-septembar i oktobar-decembar 2015. godine, a usklađeni su sa finansijskim planom za 2015. godinu i planom javnih nabavki za 2015. godinu, te je praćeno njihovo izvršavanje kako bi se u slučaju potrebe dali prijedlozi za eventualne izmjene i dopune istih.

Od strane Federalnog ministarstva finansija, dana 03.07.2015. godine, u skladu sa članom 37. Zakona o budžetima u Federaciji BiH („Službene novine Federacije BiH“, br.102/13,9/14,13/14 i 8/15), dostavljena je Budžetska Instrukcija za izradu Izmjena i

dopuna Budžeta Federacije BiH za 2015. godinu. U skladu sa osnovnim ciljevima koje je postavila Vlada Federacije BiH u cilju postizanja stabilnog i održivog budžetskog sistema pristupili smo preispitivanju planirane strukture rashoda za 2015.godinu, izvršili detaljno razmatranje i mogućnost ušteta, te predložili iznose za rebalans. Putem BPMIS aplikacije i u printanoj formi Federalnom ministarstvu finansija –Sektoru za budžet i javne rashode smo dostavili Izmjene i dopune Budžeta za 2015.godinu dana 08.07.2015. godine.

U skladu sa članom 15. Zakona o budžetima u Federaciji BiH („Službene novine Federacije BiH“, br.102/13, 9/14, 13/14 i 8/15), primili smo Instrukciju za budžetske korisnike br.2 od strane Federalnog ministarstva finansija za dostavljanje finansijskih zahtjeva za period 2016-2018. godina. U skladu sa primljenom Instrukcijom sačinili smo finansijske zahtjeve za ovaj period. Prilikom izrade zahtjeva vodili smo računa da zahtjevi budu u okviru date početne granice rashoda od strane Federalnog ministarstva finansija, a za procjenu troškova smo koristili raspoložive informacije iz strateških i planskih dokumenata Agencije, uz timski rad svih sektora u Agenciji (uvažavajući pri tom sve upute, sugestije i prijedloge radi što realnije procjene za dodjelu potrebnih finansijskih sredstava). Troškovi su planirani po pojedinim ekonomskim kodovima, tj. u skladu sa analitičkim kontnim planom za budžet koji je sastavni dio Pravidnika o knjigovodstvu u Federaciji BiH. Izdatke za materijal i usluge smo realno planirali vodeći računa da ne dođe do prekomjerne potrošnje budžetskih sredstava. Predviđenu nabavku stalnih sredstava smo sveli na minimalan nivo, a plaće, doprinose i broj zaposlenih smo planirali na nivou 2015. godine.

Prema Pravilniku o finansijskom izvještavanju i godišnjem obračunu budžeta u Federaciji Bosne i Hercegovine („Službene novine Federacije BiH“, br. 69/14), kao budžetski korisnik smo bili u obavezi izraditi i podnijeti kvartalne finansijske izvještaje za 2015. godinu. Kvartalni izvještaj za period od 1. januara do 30. juna smo podnijeli Federalnom ministarstvu finansija 20.07.2015. godine, a kvartalne izvještaje za period 01. januar do 30. septembra 2015. godine smo podnijeli Federalnom ministarstvu finansija 19.10.2015. godine. Kvartalne izvještaje smo sačinili u skladu sa gore navedenim Pravilnikom.

Zahtjeve za sredstvima iz budžeta za period 2016-2018. godina dostavili smo Federalnom ministarstvu finansija putem BPMIS-a,kao i u printanoj formi dana 12.08.2015. godine.

Iz novčanih sredstava Agencije u drugom polugodištu 2015.godine pokrivena su obaveze u iznosu od KM 104.600,00 i to:

- plaće zaposlenika
- troškovi za nabavku i održavanje stalnih sredstava
- drugi izdaci i troškovi u skladu sa zakonskom regulativom.

Nabavka i održavanje stalnih sredstava je vršeno sukladno sa zakonskim propisima. Postupci nabavke opreme putem direktnog sporazuma su provedeni i uspješno

završeni sukladno sa člankom 90. Zakona o javnim nabavkama Bosne i Hercegovine („Službeni glasnik BiH“, broj 39/14), Pravilnikom o postupku direktnog sporazuma Agencije broj: 01-02-53/15 od 23.02.2015. godine, sukladno sa člancima 13. i 22. Statuta Agencije i Planom javnih nabavki broj: 01-14-2-151/15 od 13.04.2015. godine. Nabavljena su samo ona stalna sredstva koja su bila neophodna za neometan rad Agencije.

Plaće zaposlenika su isplaćivane za pet zaposlenika u skladu sa Pravilnikom o plaćama i drugim primanjima zaposlenika broj: 01-14-42/2015 od 19.06.2014. godine. U drugom polugodištu 2015. godine Agencija nije imala nikakvih isplata koje se odnose na rad u komisijama, a nije imala ni ugovore o djelu po bilo kojem osnovu. Izvještaj o naknadama komisijama je redovno podnošen u Glavni operativni centar u Federalnom ministarstvu finansija.

Svi drugi izdaci i troškovi za period juli-decembar 2015. godine su svedeni na minimum. Prilikom izdavanja putnih naloga i odobravanja dnevnica postupalo se racionalno i u skladu sa zakonom, a službeno vozilo je korišteno samo po potrebi, tako da su postignute velike uštede na gorivu.

U ovom periodu smo sklopili Ugovor o isporuci toplotne energije sa KJKP „TOPLANE“, Sarajevo i Ugovor o pružanju komunalnih usluga sa JKP „RAD“, jer u prvom polugodištu potrošnja ovog energenta nije bila regulisana na adekvatan način. Ugovore koje smo sklopili sa drugim dobavljačima, a koji se odnose na isporuku stalnih sredstava i pružanje drugih usluga smo ispoštovali u cijelosti u ovom periodu.

Odobrena budžetska sredstva prema Finansijskom planu i Rebalansu finansijskog plana za 2015. godinu su utrošena u manjem obimu nego što je planirano i to djelimično radi ušteda, a dijelom radi toga što Agencija nije imala predviđeni broj zaposlenika. tj imala je 5 uposlenih umjesto 11. S obzirom na okolnosti koje su uticale na upošljavanje osoblja koje je planirano, analiza planiranih i izvršenih rashoda pokazala je da su izvršeni rashodi u drugom polugodištu 2015. godine srazmjerni ili manji od broja zaposlenih.

Sektor za računovodstvo je proveo i dodatne aktivnosti vezano za pravilno arhiviranje dokumentacije ovog sektora, te je uskladio listu registraturne građe sa stvarnim potrebama, a izmjene i dopune je odobrio Arhiv Federacije svojim aktom broj: 02-48-6-360/1-15 od 30.09.2015. godine.

Računovodstveno-finansijski sektor se aktivno uključio u izvršavanje zadataka i aktivnosti koje ovaj sektor treba poduzeti u cilju postizanja što boljih rezultata u realizaciji Opšteg plana borbe protiv korupcije. Nakon izvršene analize svih internih akata iz oblasti tekućih izdataka kao što su putni troškovi, reprezentacija, telefonski troškovi i sl. ustanovljeno je da su usklađeni sa propisima višeg reda.

Zaposlenicima je i u drugom polugodištu 2015. godine omogućeno pohađanje seminara radi kontinuiranog stručnog usavršavanja u skladu sa Pravilnikom o obrazovanju i usavršavanju zaposlenih Agencije za reviziju privatizacije u FBiH, broj:

01-02-83/15 od 11.03.2015.godine, kako bi se kontinuiranim praćenjem propisa iz oblasti računovodstva i finansija osigurala njihova blagovremena primjena i stvorili što bolji uslovi za rad Agencije.

11. RAD NA REVIZIJI

Faze i planirani tok revizije

Postupci revizije privatizacije započinju prikupljanjem dokumentacije potrebne za proces revizije. Kako su u postupcima privatizacije, osim privrednih društava i banaka koja su bila predmet privatizacije, izravno ili neizravno sudjelovale i brojne pravne i fizičke osobe te tijela državne uprave, kao i osobe s javnim ovlastima, tako se i dokumentacija za provedbu revizije prikupljala kod svih navedenih subjekata. Najveći dio podataka i dokumenata pribavio se kod Federalne Agencije za privatizaciju i kantonalnih agencija za privatizaciju, Agencije za bankarstvo, zatim kod privrednih društava kod kojih se obavljala revizija, te od ostalih relevantnih institucija i organa koji su učestvovali u procesima privatizacije.

Najvažniji podaci i dokumenti u privrednim društvima kao i u organima i institucijama za privatizaciju na osnovu kojih se obavljala revizija su:

- knjigovodstvena vrijednost državnog kapitala prema početnom bilansu stanja privrednih društava i banaka,
- promjene koje su nastale na kapitalu kao i druge materijalno značajne promjene na imovini i obavezama, od dana utvrđivanja početnog bilansa stanja do dana privatizacije i od dana privatizacije do dana završetka revizije,
- vrijednost i način raspolaganja imovinom iz pasivnog podbilansa od strane privrednog društva i drugih subjekata,
- ispunjavanje ugovornih obaveza od strane kupca definiranih ugovorom o prodaji državnog kapitala,
- da li su od dana pokretanja do okončanja procesa privatizacije aktivnosti nadležnih nositelja procesa privatizacije i kupca bile u skladu sa važećim propisima.

Također je u procesu revizije privatizacije pored navedenih dokumenata tražena i sljedeća dokumentacija:

- dokumentacija o pretvorbi vlasništva u privrednim društvima gdje je pretvorba izvršena prije donošenja Zakona o privatizaciji preduzeća;
- odluka organa upravljanja o pretvorbi sa svim obaveznim priložima;
- rješenja ili suglasnosti Agencija (Agencija za privatizaciju),
- zapisnik s osnivačke skupštine,
- statut (sa svim izmjenama i dopunama, s datumima primjene izmjena i dopuna),
- rješenja suda o upisu u sudski registar,
- podaci o dionicama (broj, nominalna vrijednost, serija, vrsta, rod) ili udjelima,

- ugovori o kupnji dionica, odnosno udjela na osnovu kojih je izvršen upis u knjigu dionica ili u knjigu udjela,
- podaci o sticanju vlastitih dionica (odluke skupštine, ugovori ili drugi dokumenti na osnovu kojih su stečene vlastite dionice),
- ugovori o prijenosu dionica, odnosno udjela na temelju kojih su evidentirane
- promjene u knjizi dionica ili knjizi udjela,
- dokumentacija o dokapitalizaciji (ugovori, odluke skupštine, virmanski nalozi o uplatama gotovine, procjena vrijednosti imovine koja se unosi),
- dokumentacija o pretvaranju potraživanja u udjel (odluka, pravno utemeljenje potraživanja, ugovor o pretvaranju potraživanja u ulog i mišljenje komercijalne revizije),
- knjiga dionica ili knjiga udjela sa svim promjenama,
- popis članova uprave, upravnih i nadzornih odbora, s datumima imenovanja i razrješenjima,
- ugovori o prodaji nekretnina, zajedno s odlukama nadležnih tijela,
- podaci o zahtjevima prijašnjih vlasnika za povrat imovine koja se nalazi u imovini društva,
- izvještaji revizorskih kuća i interne revizije,
- analitička evidencija dugotrajne imovine za sve godine od pretvorbe, uključujući podatke o smanjenju vrijednosti i amortizaciji,
- analitička evidencija kupaca i dobavljača za sve godine od pretvorbe,
- popis privrednih društava u kojima je društvo nastalo pretvorbom ili većinski vlasnik ima vlasnički ili suvlasnički udjel, te dokumenti, evidencije i financijski izvještaji potrebni za provedbu revizije osnivanja i revizije poslovanja za sva navedena privredna društva i banke.

Rezultati i izvještavanje

Na osnovu prikupljenih podataka, izvršenih analiza i procjene revizije po fazama njenoga provođenja, utvrđivale se sve značajne činjenice vezane za reviziju privatizacije subjekata nakon čega su donošena rješenja o provedenoj reviziji privatizacije.

Po donošenju Rješenja pristupalo se izradi izvještaja o obavljenoj reviziji pretvorbe i privatizacije. Metodološki, svi izvještaji su sastavljeni na istovjetan način i u pravilu se sastoje od šest dijelova.

U prvom dijelu je navedena zakonska regulativa na osnovu koje je privredno društvo trebalo obaviti pretvorbu i privatizaciju.

U drugom dijelu navode se osnovni podaci o poslovanju privrednog društva u vrijeme pretvorbe, podaci o statusnim promjenama koje su nastale u razdoblju od pretvorbe privrednog društva do dana obavljanja revizije, te podaci o vlasnički povezanim društvima.

U trećem dijelu opisan se postupak pretvorbe sa svim nepravilnostima koje su revizijom utvrđene.

Četvrti dio izvještaja se odnosi na reviziju postupaka privatizacije, a obuhvata sve promjene vlasničke strukture nastale nakon pretvorbe privrednog društva, dokapitalizaciju, sanaciju i stečaj društva.

U petom dijelu izvještaja prezentirati će se podaci o poslovanju društva i vlasničkoj strukturi u vrijeme obavljanja revizije.

U šestom dijelu izvještaja, a nakon provedenog postupka i na temelju utvrđenih činjenica i prikupljenih dokaza u procesu revizije privatizacije, a prije završetka konačnog revizorskog izvještaja, Agencija priprema nacrt izvještaja o reviziji kojeg dostavlja upravi privrednog društva ili banke na komentar.

Nakon razmotrenih komentara uprave privrednih društva ili rukovodioca organa, organizacije i institucije, odnosno prije pripreme konačnog izvještaja i u slučajevima neslaganja, u konačan izvještaj, Agencija je uključivla njihove relevantne komentare i dala revizorsko mišljenje o provedenoj reviziji privatizacije privrednih društava i banaka.

Pojedinačni izvještaji su sastavljeni u skladu s odredbama Zakona o reviziji privatizacije i pravilima revizorske struke, a sadržavaju će sve značajne podatke na osnovu kojih su ocijenjeni postupci pretvorbe i privatizacije. Također, izvještaji sadržavaju podatke o osobama koje su bile odgovorne za provedbu privatizacije, nazive pravnih osoba ili imena fizičkih osoba koje su obavile procjenu vrijednosti preduzeća, imena osoba odgovornih za utvrđene nepravilnosti, te vlasničku strukturu u vrijeme privatizacije i u vrijeme obavljanja revizije. U izvještaju su navedena i vlasnički povezana društva, kao i zakonski zastupnici u tim društvima.

Agencija je za efikasan rad fokus stavila na reviziji provedenih privatizacija. Djelujući u tom smjeru, sprovodile su se sljedeće aktivnosti:

Djelujući u tom smjeru, sprovodile su se sljedeće aktivnosti:

- odlazak i održavanje sastanaka sa predstavnicima pomenutih Agencija, ministarstvima (premijerima i ministrima);
- saradnja sa Komisijom za vrijednosne papire,
- održavanje sastanaka sa predstavnicima privatiziranih preduzeća,
- svakodnevno udovoljavanje i održavanje sastanaka sa zainteresiranim licima povodom privatizacije odnosnih preduzeća (načelnici općina, općinska vjeća, sindikati, radnici)
- pružanje informacija medijima, povodom pokrenutih revizija i informisanje o istim.

Odgovornost revizora je sačiniti Izvještaj o obavljenoj reviziji pretvorbe i privatizacije privrednog društva na osnovu utvrđenog činjeničnog stanja. Postupci revizije započinjali su donošenjem Rješenja o otpočinjanju revizije, te slanje svim relevantnim stranama dopisa za prikupljanjem dokumentacije potrebne za proces revizije. Najveći

dio podataka i dokumenata prikuplja se od Federalne Agencije za privatizaciju i kantonalnih agencija za privatizaciju, Agencije za bankarstvo, kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije. Revizija je vršena u skladu sa Zakonom o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), i Zakonom o reviziji institucija u Federaciji Bosne i Hercegovine ("Službene novine Federacije BiH", broj 22/06). Postupak revizije proveden je u skladu sa revizorskim standardima Međunarodne organizacije vrhovnih revizijskih institucija – INTOSAI ("Službene novine Federacije BiH", br. 30/11 i 62/14) i Etičkim kodeksom profesionalne etike revizora.

U tekstu koji slijedi, prikazan je pregled izvršenih revizija te njihova faza realizacije

1. Privredno društvo „Dita“ d.d. Tuzla

Početak marta 2015. godine, revizori su pokrenuli postupak revizije privatizacije privrednog društva „Dita“ d.d. Tuzla. Na navedenoj reviziji radilo se oko tri mjeseca, Nacrt izvještaja je dostavljen Upravi Privrednog društva na očitovanje, što je zakonski zastupnik i učinio, a zatim je zaključena revizija navednog privrednog društva i donijet konačan Izvještaj sa Rješenjem, te isti poslan prema nadležnim organima kao i Tužilaštvu TK i Pravobranilaštvu Tuzlanskog kantona na daljnje postupanje. Također, o provedenoj reviziji je upoznata i Vlada TK, jer je ista bila nadležna kod privatizacije društva „Dita“ d.d. Tuzla.

Trenutno je u fazi postupak po žalbi KAP TK, uloženoj na rješenje Agencije.

Predmet je vraćen na ponovni postupak pred prvostepenim organom shodno Rješenju Vlade Federacije BiH br. 426/2016 od 03.03.2016. godine.

2. Privredno društvo „Feroelektro“ d.d. Sarajevo

Rješenje o pokretanju postupka revizije privatizacije privrednog društva „Feroelektro“ d.d. Sarajevo, doneseno je 02.04.2015. godine.

Zbog obimnosti cijelog slučaja (vođenje dugogodišnjih upravnih sporova i upravnih postupaka), te izuzimanja tražene dokumentacije kao i godišnjih odmora relevantnih institucija (sud i tužilaštvo), dana 19.10.2015. godine, završen je Nacrt izvještaja, te je isti prosljeđen Upravi Društva na očitovanje.

Uprava društva je svojim Dopisom broj 810/15 od 03.11.2015. godine tražila zamolbu za produženjem roka za izjašnjenje na Nacrt izvještaja na dodatnih 60 dana, a zbog obimnosti izvještaja. Agencija je razmotrila Dopis i dostavila dana 13.11.2015. godine odgovor Upravi Društva u kojem se ostvalja dodatni rok u trajanja od 30 dana za sačinjavanje i dostavu Komentara/izjašnjenja na Nacrt izvještaja.

Dana 22.12.2015. godine doneseno je Rješenje br. 01-19-1-414/15 o izvršenoj reviziji pretvorbe i privatizacije „Feroelektro“ d.d. Sarajevo. Na navedeno rješenje Agencija za privatizaciju F BiH uložila je Žalbu br. 04-19-2177-1/15 od 08.01.2016. godine. Drugostepeni organ je Rješenje Agencije za reviziju privatizacije u FBiH o izvršenoj reviziji pretvorbe i privatizacije „Feroelektro“ d.d. Sarajevo broj: 01-19-1-414/15 od 22.12.2015. godine, proglasio ništavim, s obzirom da u predmetnom postupku postoji res iudicata (presuđena stvar).

Privredno društvo hotel Holiday Sarajevo HTD „Sarajevo“ d.o.o. Sarajevo

Dana 14.09.2015. godine, pokrenuta je treća revizija privatizacije privrednog društva hotela Holiday Sarajevo HTD „Sarajevo“ d.o.o. Sarajevo. Prikupljena je većim dijelom dokumentacija te je urađen Nacrta izvještaja o izvršenoj reviziji pretvorbe i privatizacije navedenog društva, koji je upućen na komentar.

12. ZAKLJUČAK

Uspostavljanje Agencije za reviziju privatizacije i njena, Zakonom i aktima Vlade Federacije Bosne i Hercegovine, definisana djelatnost ima važnu ulogu u ostvarenju ciljeva ulaska u evropske integracije.

Agencija za reviziju privatizacije je u potpunosti posvećena da izvrši sveobuhvatnu reviziju privatizacije na profesionalan i odgovoran način, na načelima dosljedne primjene Zakona, uputa i odluka Vlade Federacije Bosne i Hercegovine, transparentnosti u radu i otvorenosti za sve institucije i stručnu javnost, ali i primjerenog pravnog okruženja, te adekvatnog provođenja aktivnosti nadležnih institucija kako bi ostvarila uspješan rad i strateške ciljeve.

Broj: 01-05-1-110/16
Sarajevo, 05.04.2016. godine

DIREKTOR

Vedad Duraković, dipl.oec

